

Vnnd haben do selbigist vns uffgehalden, das wir enen des nicht haben dorffenn vorwissenn, So wir enen nicht geschuldigt hetten.

Vnnd seyn do mitte mit enen gantz entscheiden.

Vnnd by dem tage seyn gewest Niclas Jeronimj¹⁾ vnnd M. Johannes Frawenburgk, die zzeit Stadschreiber. (19/3 2)

1473.

Anno 1473 Georg Emmerich bald nach seines Vatern tode in Rath kommen. Seine Stiffmutter, so noch dem Vater blieben, hatt Agnes geheissen, des Petrij von der Heiden vnterm Fürstenstein tochter.

1474.

31. Anno etc. lxxiiij. Am montage nach Circumcisionis dominj, Ist Georg Schüssel, Hans Werner, mit den eldisten Tuchmacher kommen uffs Rathuss. Dasselbst ist Seifrid Goswinn Bürgermeister gewest, vnnd habenn angebracht, Wy sihe deme Rathe so gewant weren, das sihe mit em leib vnnd gutt zcu setzenn weldenn.

Nw fulten wir vnnd sihe, das der gulde awsluge, vnnd gulde ane zcwene vnnd ane drei ein sk. gr. Vnd haben gebeten: Wer es zcu thun, das man muntzen welde, So wer vns y ane cleine müntze nicht enthalden mochtenn.

Doruff wart enen geantwort, Man welde sich mitte bekommern vnnd handel haben, was ein den dingen zcu thuen were.

32. Tuchmacher. Eodem anno habenn dy Tuchmacher verboten uffm gantzen Hantwercke: Das nymant soule gein Budissin uff den margkt zcihenn vnnd aldo Wolle kauffen.

Das sich dy von Budissin angenommen haben, vnnd darumb dem Rathe geschrebenn.

Dorumb dy Tuchmacher besant sein wordenn, vnnd haben das müssen abethunn. Eodem anno lxxiiij. Haben dy Tuchmacher gelobet, das sihe uff dy schar, uff jren Hantwercke nicht wellen verbitten Wulle zcu kouffen: Sundern es solle eynen ydern frey sein.

Vnnd der Rath hat enen gesatzet, das er das fort auch nicht mehr verhängen welde.

Item eodem anno haben sihe wellenn dy Weitassche dem Zölner nehmen vnd nymme verkauffen.

Dorumb sihe auch angeredt sein. Vnnd habenn das müssen abethun. Vnnd zugesaget, das sihe dem Zcolner wellenn so feel Weitassche lossen, als er bedorffende wer. Wenn dy armen lüte suchenn dy Weitassche sere bey dem Zcolner.

33. Vonn Jhonn Elwill. Anno etc. lxxiiij hat mir der Hauptmann Caspar Nostitz gesaget, das ers habe gehort von seynem Vater.

¹⁾ Dieser Niclas Hieronymj ist anno 1479 vmb grober vberfahrung kegen dem Rathe gefenglich eingenommen, vnd den 27. Maij 24 auss seiner behausung darein er vom Rathause gangen, auss der Stadt (nimmer dahin nach seiner vorschreibung zukommen) weggezogen.